


## TORITENY - ALAHADY faha-15 TSOTRA - TAONA D



*“Mandehana àry, ka manaova toy izany koa”.*

Ry kristianina havana, amin'izao Alahady faha-15 mandavantaona izany hoe eo anivon'ny dia sady ady ivelomantsika ny finoantsika isika araka ny voalazantsika matetika hoe ; ny finoana dia tsy tany malemy anorenam-pangady fa tany lonaka hiasan'ny fahasoavan'Andriamanitra ka mamokatra ho antsika sy ireo manodidina atsika ka mahatonga atsika ho fanasina sy fahazavana. Izany ny mahatonga ny hoe fahaizana mampitraotra ny finoana sy ny fiainana andavanandro. Ao anatin'izao Alahady faha-15 tsotra izao dia miditra amin'ny tapan'ny faharoa amin'ny fandalinam-pinoana isika. Raha mijery tsara isika dia Alahady 30 eo ho eo mandavantaona no andalinantsika ny finoana. Tsy mahagaga ry Kristianina havana amin'izao alahady ivon'izany fandalinam-pinoana hivelomantsika an'izay finoana izay, raha ny votoatin'ny fampianarana anio dia ny fiainana sy ny fahaizantsika mampitraotra ny finoana sy ny fiainana andavanandro izay. Tsy lavitra Andriamanitra fa eo akaikintsika io, satria ny eo akaikintsika dia mitovy endrika amin'Andriamanitra. Ny didim-pitiavana fototra hivelomantsika amin'ny maha-

zanak'Andriamanitra atsika no fatom-pampianarana androany. Araky ny voalazan'ny Md Paoly mandalo ny zavatra rehetra, mandalo ny finoana, ny fanantenana fa ny fitiavana kosa maharitra ary izay ny fototry ny fampianarana androany. Tsy mahagaga raha tonga ity mpanora-dalana ity nanontany an'i Jesoa inona ny ataoko hazahoako ny fiainana mandrakizay. Ao

**Vakiteny I :** Det. 30, 10-14

**Salamo :** Sal. 68

**Vakiteny II :** Kôl. 1, 15-20

**Evanjely :** Lk. 10, 25-37

amin'ny Evanjely hafa ao amin'i Md Marka dia ny tanora feno fanentanana no nametraka io

fanontaniana io. Ny tanora moa fanantenana izay mahatonga eto amin'ny diosezintsika misioneran'ny fanantenana ireo tanora satria manontany ny hoavy.

Henontsika tamin'ny Evanjely teo ary ho antsika rehetra fa tsy ho an'ny tanora ihany, niany tokoa ny hoavy hoy i Jesoa fa tsy amaray. Arakaraky ny andrafetantsika ny fiainantsika ny hoavy, raha tsara rafitra izao fiainantsika izao dia ho tsara ny hoavintsika.

Tsapan'ilay mpampiana-dalàna izay ary fantatr'i Jesoa fa tsy hoe tahaka ireo tonga manontany azy, tahaka ireo hanao izay haminganana sy hamitapitahana azy, henontsika ireo farisiana, ireo sadoseana, na dia mpampiana-dalàna aza mametraka fanontaniana. Izay ny mahatonga an'i Jesoa miditra lalindalina kokoa amin'ny famaliana ny an'ity mpanora-dalàna ity ka nanontanian'i Jesoa izy hoe : "Inona ny voasoratra ao amin'ny lalàna ?" Ny lalàna dia manabe atsika, tsy hoe discipline fotsiny fa manoro lalàna atsika ary izay no tsara mba ho tandalàna ny firenena ary lalàna ho tanterahina, hivelomana fa tsy an-taratasy fotsiny.

Izay no navalin'ilay mpampiana-dalàna fa tsy maintsy mitia an'Andriamanitra amin'ny fo manontolo, amin'ny hery manontolo ary ho tia namana tahaka ny tenanao. Namaly ary i Jesoa ary nilaza fa tena marina ny famaliny kanefa ilay mpampiana-dalàna te-hafantatra lalindalina kokoa an'Andriamanitra satria ny fitiavana an'Andriamanitra dia mitovy amin'ny fitiavana namana ka raha tia ny namana dia ao amin'Andriamanitra tokoa ka nanontany hoe : " Iza ary no namako" ? raha amin'ny teny frantsay moa no adika dia ny hoe "mon prochain" ka izay akaikinao izay no nanontaniany.

Azon'i Jesoa atao ny nampianatra an'ity mpampiana-dalàna ity fa fantatr'i Jesoa fa tsy ho azy ihany ny fampianarany fa ho antsika koa ka nanao ilay fampianarana lehibe izay fantantsika rehetra dia ny fanoraharana mikasika an'ilay samaritana tsara fanahy.

Araky ny voalazan'io fanoharana io dia misy lehilahy anankiray nidina avy tany Jerosalema ho an'ny Jeriko, nisy nikapoka ka naratra.

Azo lazaina fa isika olombelona io, avy amin'ny tanàna masina, isika eto amin'izao tontolo izao dia maro ny zavatra mikapoka atsika.

Henontsika teo fa nisy nandalo, nisy ireo mpisorona, nisy ireo mpanora-dalàna, nisy ireo levita mpisorona, ireo izay mahafantatra tsara ny lalàna fa tsy nijery azy, nefa ity Samaritana izay tsy nifankahazo tamin'ny Jody kanefa Jody no naratra dia henontsika fa io Samaritana io no nangoraka.

Izany tokoa ry Kristianina havana, izao taona masina famindram-po izao ary io fanoharana io dia mampibaribary an'Andriamanitra Ray be fitiavana be famindram-po. Ary i Kristy io Samaritanina tsara fanahy io nandray azy sy nikolokolo azy ary dia izay ny tena fitiavana. Raha manontany isika iza ny namako tahaka an'ilay mpanora-dalàna, tsy sentosento ny fitiavana fa fiainana, fikarakarana, fangorahana, fidirana, fananana fotoana, tsy hoe mandalo fotsiny fa miditra an-tsehatra mikarakara araka ny voalazantsika hoe : "tany lonaka hiasan'ny fahasoavan'Andriamanitra isika" ary dia isika no mikarakara ireo akaiky atsika, ireo namantsika izany hoe manompo. Ary izay ny fivavahantsika dia ilay Andriamanitra manompo ka noho izany isika koa tsy maintsy manompo ny hafa no manana ny disponibilité, manana ny fahavononana

amin'ny fikarakarana izay.

Anisany nanaitra ahy tam-pamakiana an'ity Evanjely ity, rehefa nentiny tany an-tranombahiny izy dia nilaza tamin'ilay tompon-trano "tsaboy izy ary na ohatrinona na ohatrinona ny laninao amin'ny fitahana azy, honerako rehefa miverina aho". Azo lazaina izany fa isika io tranombahiny io, ny Eglizy endrikin'ny famindrampon'Andriamanitra atolotr'i Jesoa amintsika ireo namantsika. Isika Eglizy kely fianakaviana ao an-trano ao no tranom-bahiny ary izay lazain'i Jesoa izay hoe karakarao, dia io koa ny baiko azontsika ry Kristianina havana, tsy baiko mamoritra fa hivelomana ny finoana satria manko matetika raha vao miteny hoe baiko dia mamoritra izay ny dikany amintsika. Filazana ny tena izy, ny maha-izy atsika dia natolotr'i Jesoa amintsika izany hoe ny fikarakarana an'ireo akaiky atsika rehetra manomboka ao amin'ny Eglizy kely, ao amin'ny Eglizy fiombonana dia isika no asaina mikarakara izay, tsy hijery na ohatrinona na ohatrinona izany hoe tsy ho voafetra izay fitiavana izay. Izany ny voalazan'i Jesoa raha mikarakara ireny isika dia mahazo zato heny ary mihoatra izay eritreretintsika aza. Ny tadiavin'i Jesoa dia isika hahafoy, tsy misaraka izany ny disponibilité sy ny renoncement , miala amin'ny avonavona, amin'ny fitiavan-tena, amin'ny fialonana izay rindrina mahatonga ny fisaratsarahana sy ny korontana eto amintsika.

Ry Kristianina havana aoka isika amin'izao ezaka ataontsika amin'izao taona masina famindram-po izao indrindra amin'ny dia sy ady hirosoantsika lalindalina kokoa amin'ny fampitrahofana ny finoana sy ny fiainana andavanandro dia horaisintsika tana ireo akaikintsika fa indrindra ireo izay anatin'ny fahoriana, hikarakara azy isika hivelona ny finoana isika tahaka ny voalaza ao amin'ny vakiteny voalohany (*Det. 30, 10-14*) raha nampianatra ny vahoakany Andriamanitra ary izay koa ny antitraterin'i Md Paoly tany Kolosy amin'ny vakiteny faharoa (*Kôl. 1, 15-20*), mibanjina an'i Kristy isika dia mibanjina an'ireo manodidina atsika ary i Kristy efa teo talohan'izao rehetra izao ary tamin'ny alalany sy tao aminy no nahariana ny zava-dehetra. Na dia eo aza ny fahasoratan'izay fikarakarana sy ny fikolokoloana izay eo akaikintsika izay ka ialantsika ny toetra mamoritra atsika dia ny fitiavan-tena ka amin'izay dia mahatoky isika fa i Kristy no nandresy an'izao rehetra izao ka eo anivontsika mandrakariva izy hoy Md Paoly ka hahafahantsika manatanteraka an'izay sy baikon'i Kristy ary izay ny maha-Kristianina atsika.

Ry Jesoa Tompo ô mitodika aminao tokoa izahay amin'izao Alahady izao, eto anivonay tokoa ianao akaiky anao satria endrikao no endrika maha-zanak'Andriamanitra anay ireo manodidina anay ka ampio ary izahay ho Samaritana tsara fanahy ka hijery, hikarakara ireo manodidina anay izay eo anilanay mandrakariva ary ho vonona hamonjy an'izay rehetra mila fanampiana sy fanompoana avy aminay ka hahatsapa izy ireo fa tsy lavitra Andriamanitra fa akaiky azy ireo tokoa. Amen

Mompera Arseveka Mgr Benjamin Ramaroson